

1 Tesalonicenses

Pablo gojañumi Jesu yaräre Tesalónica majaräre

¹ Yꝰ Pablo, Silvano, Timoteo mera ipũre mũare gojabeoa. Mũarꝰ Tesalónica majarã mari Pagꝰ Goãmꝰ yarã árĩrã mari Opꝰ Jesucristo yarã sã ähraa mũa. Eropigꝰ Goãmꝰ mari Pagꝰ, Jesucristo mari Opꝰ mera mũare õadoreo. Īgꝰ itamuri mera õaro árĩque.

Jesu yarã Tesalónica majarãꝰ Jesure erã õaro umupeorare wereñumi Pablo

² Goãmũre serẽrã mũa árĩpehrerãre guña mucubiriri mera. Mũa Jesure umupeorire guñarã “Õatariari ähraa,” arĩ serẽniguicãa gũa Goãmũre. ³ Mũa Jesucristore “Diaye iigũ ährimi,” arĩ umupeoniguicã waĩcũa. Eropa umupeoniguicãrã Jesucristo ya árĩburire õaro iirã waĩcũa. Jesucristore, gajirã sãre mũa õaro mahi umupeorã waĩcũa. Eropa mahirã Jesucristo ya árĩburire bũrigã iirã waĩcũa mũa. Eropirã Jesucristo ĩgꝰ itamurire corerã waĩcũa mũa. Īgũre eropa corerã ĩgꝰ yare iirã duhubirã waĩcũa. Eropa iirã mũa Goãmꝰ mari Pagꝰ ĩacũ õaro iiaa. Goãmũre gũa serẽrã irire mũa eropa õaro ii waĩcũrare guñaniguicãa. ⁴ Gũa acawererã, õpa peeque. Mũare Goãmꝰ mahimi. Eropigꝰ mũare ĩgꝰ yarã árĩmorãre beyerꝰ. Irire masia gũa. ⁵ Gũa sohõ árĩrasubu mũa mera árĩrã

õari buherire mware gua wererã gua pepiri mera werebirabũ. Espiritu Santo igũ doreri mera igũ yare wereabũ gua mware. Eropa werecũ iri buheri diaye ta arĩrire õaro masiabũ mwa.

⁶ Eropa masirã mwa iri õari buherire õaro pee ñeabũ mwa mucubiriri mera. Eropirã mwa eropa peecũ ãha gajirã gamebirã mware ñero iima. Erã mware ñero iiquerecũ ta mwa Espiritu Santo itamuri mera õaro mucubiriabũ. Eropirã gua mwa watope arĩrã gua õaro arĩricurire masiabũ mwa. Eropirã mwa gua diaye maja iirare ãarã guare ãhacũbũ. Eropirã Jesu mari Opũ igũ iidiro dopa ta iiabũ mwa. ⁷ Mwa eropiicũ pee Jesu yarã Macedonia yeba majarã, Acaya yeba majarã sã mwa eropa õaro iirare peeañorã. Eropa peerã erãpũ mwa iidiro dopa ta iiañorã erã sã. ⁸ Eropirã mwa guere Jesucristo mari Opũ yare peesũyoro. Goãmure mwa umupeorare Macedonia majarã Acaya majarã sã peeañorã. Erã dihta peebirañorã. Arĩpehrero majarã mwa umupeorare peeañorã. Eropirã gua mwa umupeorare gajirã masituhajacũ ãha werebirica erãre guapũ. Erãpũ guare werema. ⁹ Õpa arĩma guare mwa iirare wererã. “Tesalónica majarã mware õaro bocatĩriñorã mwa erogue ejacũ. Erã Jesucristo yare pee erã goãmarã wéanirãre umupeonirã arĩrã gohrotoañorã. Gohrotorã Goãmũ gohra ojocarigũre diaye iigure umupeonũgañorã. Eropirã dohpague Goãmũ yare iirã iiañorã. ¹⁰ Eropirã Goãmũ magũ Jesucristo igũ umũsigue ariburiñe õaro corerã ãhrañorã,” arĩ werema guare. Jesure sĩridigũre Goãmũ

masupũ. Eropigu Jesupũ marire ñetariaro dipuwajacũbonirãre taudigu ãhrimi.

2

Pablo Tesalónicaque igũ buherare wereñumi

¹ Mũa pohro gũa árĩrã eropa árĩcãrã iibirabũ. Mũare òaro itamurã árĩmũrabũ gũa. Irire òaro masia mũa, gũa acawererã. ² Ero core Filipo maca gũa árĩrã ñero taribũ. Gũare ñero erã iirare masia mũa. Gũare erã eropa ñero iiquerecũ ta Goãmũ itamuri mera gũiro mariro Goãmũ yare òari buherire wereniguirã gũa ejabũ mũa pohroguere. Mũa árĩro sãre gũare masa bajarã erã ñhaturiquerẽ òari buherire buheabũ gũa mũare. ³ Eropirã mũa pohro árĩrã mũare gũa werera òaro diaye majare buheabũ gũa mũare. Eropa wererã mũare ñero iidiarã árĩbirimũrabũ gũa. Mũare gũyadjarã buhebirimũrabũ gũa mũare. ⁴ Goãmũ gamero dopa ta buhea gũa. Òari buherire buhemorãre Goãmũ beyemi gũare. Eropa beyegu igũ ya buherire gũare weredoremi. Eropirã masa gũare erã ñhasũaburire buherã iibea gũa. Goãmũpũ gũare igũ ñhasũaburire igũ yare buhea gũa. Goãmũ mari pepirire dohpa mari iidiarire òaro masimi. ⁵ Eropirã gũa mũare òari buherire wererã gajinore amarã ejabirimũrabũ. Eropirã werenigui gũyarã iibirimũrabũ gũa mũare. Eropirã gũa buherã mũare niyerure aĩmorã iibirimũrabũ. Irire gũa mũa pohro eropa òaro iirare mũa masia. Goãmũ sã irire masimi. ⁶ Gũa eropa buherã mũa gũare umupeoburire

dorebirimurabũ. Gajirã sãre eropa ne dorebirimurabũ. ⁷ Gũa Cristo ãgu apinirã árĩrã mũare doremasiboaya. Ne eropa dorebirabũ gũa. Gũa dorebirã majirãre nijisoro dopa ta mũare õaro iimurabũ mahiri mera. ⁸ Eropirã mũare õaro gamerã Goãmũ yare õari buherire weremurabũ gũa mũare. Gũa basi ta árĩpehrero gũa iimasi-burire mũare itamumurabũ. Gũa mahirã mũa árĩcũ eropa itamuabũ mũare. ⁹ Eropirã mũare mahirã bũrigã itamumurabũ. Irire guña mũa, gũa acawererã. Goãmũ yare õari buherire wererã árĩrã, mũa oparire serẽ garibobirimurabũ mũare. Eropirã gũa basi mohmemurabũ gũa baburire wajatamorã. Eropirã umũre, ñamigue sãre mohmemurabũ gũa.

¹⁰ Eropirã õaro Goãmũ gamero iirã ñeri dipuwaja mariro diaye ta iimurabũ mũare Jesu yarãre. Eropirã gũa mũa mera eropa queoro árĩrare masia mũa. Goãmũ sã irire masimi. ¹¹ Eropirã erã pagũ ãgu porãre ãgu õaro were ãgu mucubiricũ iidiro dopa ta gũa mũa sãre árĩpehrerãre wererã mucubiricũ iiabũ mũare. Irire masia mũa. ¹² Goãmũ mũare ãgu opu árĩroque ãgu õatariaro árĩroque mũa árĩmorãre beyedigũ árĩmi. Eropirã mũa ãgu yarã árĩrã ãgu árĩro dopa ta õaro iiniguicãro gahmea, arĩmurabũ.

¹³ Eropirã Goãmũ yare mũare gũa wererare mũa peerã õpa pepibũ mũa: “Masa erã pepiri mera iri buheri árĩbeaa. Goãmũ ya buheri ta ãhraa,” arĩ pepibũ mũa. Irire mũa eropa pepicũ masirã mucubiria gũa. Eropirã Goãmũre serẽrã, “Õhaa,” arãa gũa ãgũre. Eropa ta ãhraa.

Muare gua buheri, Goãmu wereniguiiri diaye ta áriri ãhraa. Eropigu mua Goãmu yare ta peecũ igu ya buheri mera ðaripure gohrotocũ iimi muare. ¹⁴ Eropirã Jesucristo yarã mua árĩcũ ãarã i yeba majarã Jesure gamebirãpu ñero iiañorã muare. Mua eropa wadiro dopa ta Judea yeba majarã sãre wayoro. Eroque sãre Jesucristore umupeorãre erã ya yeba majarã sã ñero iiañorã. Judio masa Jesure gamebirã erãre ñero taricũ iiañorã. ¹⁵⁻¹⁶ Mata judio masapu iribojegue majarã Goãmu ya weremuhtanirãre wejẽmurinirã árĩma. Eropirã mari Opu Jesucristo sãre wejẽñorã erã. Eropirã erã Jesucristo yare gamebirã gua sãre ñero ii cohãma guare erã ya yebare. Eropirã erã judio masa árĩbirãre erã dederebirorore gua erãre Goãmu yare werecũ guare judio masa cãhmotamurima. Goãmu yare weredorebirima guare. Erã Jesu yarãre ãhaturi árĩmurima. Erã eropiirare Goãmu gamebirigohracãmi. Eropiro erã judio masa ñero iira dipuwaja wuaro árĩtuhaya. Erãre Goãmu burigã dipuwaja moagucumi.

Pablo Tesalónica majarã pohroque dipaturi curigu wadiaripu

¹⁷ Gua acawererã, mua mera dohpaguere árĩbiriqererã ta muare guñarã iiaa. Eropirã muare burigã ãdiarã mua pohroque wadiarabu gua. ¹⁸⁻¹⁹ Bajasuburi yuhũ muare ãagu wadiarabu. Watĩpu gua wabodirore goroweoami. Eropirã gua wabiricarabu. Guare mucubiricũ iirã mua árĩcũ muare ãdiarabu. Mari Opu Jesucristo i yebague dujaricũ turaro mucubirirãca

mua mera. Eropirã mucubirirã mua mera Jesu core niguirãca. ²⁰ Eropa ta ãhraa. Mũare ãagũ Jesupũ “Õaro buhenirã ãhraa mua,” arĩgucumi gũare. Eropirã õaro mucubirirãca gũa.

3

¹⁻² Eropii mũare yoari boje gũa ãabirã mũare burigã peediarã irire guñarã Timoteore mua pohrogue obeoabũ. Ñgũ mari acaweregũ Jesu yagũ Goãmũ pohro majagũ gũa mera õari buherire buhegũ ãhrimi. Eropirã ãgũre obeoabũ Jesucristore mua õaro umupeoburire mua mucubiriburi sãre. Ñgũre obeorã gũa seyaro Atena maca dujabũ. ³ Mua Jesucristore umupeora waja gajirã mũare ñero iiañorã. Eropirã mua Jesu yare mua cóãbiriboro dopa itamubure obeoabũ Timoteore mua pohrogue. Mari Jesu yarã árĩrãre eropa ta gajirã marire ñero taricũ iirãcoma. Irire masia mua. ⁴ Mua mera ero coreguere árĩrã õpa arĩ weretuhajabũ mũare: “Mari Jesucristore umupeora waja gajirã marire ñero iirãcoma,” arĩ weretuhajabũ mũare. Eropirã gũa werediro dopa ta erã ñero iima mũare. Irire mua õaro masia. ⁵ Eropigũ mũare mahitariagũ mũare yoari boje ãabigũ mũare burigã peediabũ yũhũ. Eropigũ Timoteore obeoabũ yũhũ mua Jesure umupeorire masibu. “Watĩ mũare ñero iidoreri,” arĩgũ, “Mũare gũa buherare mũague duhuri,” arĩgũ ãgũre obeoabũ yũhũ.

⁶ Eropigũ dohpaguere Timoteo mua pohrogue árĩdi gũa pohrogue dujarami. Eropa dujaragũ õari querere gũare wereami ãgũ. Jesure mua

õaro umupeorare mũa gajirã mera õaro mahira sãre ïgu wereami guare. Eroparïgu guare mũa õaro guñara sãre wereami. “Erã sã mũare buringã ïadialama,” arï wereami ïgu guare. ïgu eropa arï werecũ peerã mucubiria. ⁷ Eropirã gũa dohpaguere ñero tarirã árïquererã mũa Jesure õaro umupeocũ peerã gũa mucubiria. ⁸ Jesure mũa õaro umupeorare pee ïgu yare mũa cóãbirirare peerã õaro pepia gũa. ⁹ Eropa pepirã Goãmũ ïaro gũa buringã mucubiria. Eropa mucubirirã Goãmũre serêa, “Õhaa,” arïrã. ¹⁰ Eropirã gũa basi mũare ïaburire Goãmũre serêniguia. Ëmuri ñamiri sãre serêniguicãa. Mũare ïadiarã Jesucristo yare mũa õaro masipehocũ itamudiacã ïgũre mũa õaro umupeonemoboro dopa.

¹¹ Goãmũ mari Pagũ ïgu basi mari Opũ Jesu mera guare itamuporo mũa pohrogue gũa waburire. ¹² Eropigu mari Opũ Jesu árïpehrerã mũa mera majarãre árïpehrerã gajirã sãre mahinemoburire iiporo mũare. Gũa mũare mahi umupeodiro dopa ta mũa sã buringã mahinemocũ iiporo mũare. ¹³ Mũare ïgu õaro itamuri mera mũa dipuwaja marirã ñeri marirã árïrãca Goãmũ mari Pagũ ïacũ. Eropa ta árïrãca mũa mari Opũ Jesu dujaricũ árïpehrerã ïgu yarã õarã mera i yebague.

4

Goãmũre mucubiricũ iidialarã õpa iique, arï were gojañumi Pablo

¹⁻² Dohpaguere Jesu mari Opũ ïgu dorero mera mũare õpa werea: “Goãmũre mucubiricũ iidialarã

õpa iique,” arĩ buheabu gũa mũare. Gũa eropa buhera pũhrũ gũa buhediro dopa ta iiayoro mũa. Iri buherire õaro masia mũa. Eropirã mũa Goãmũ yare õaro iirã ãhraa. Eropirã mũa eropa iidiro dopa ta duhubirã ta. Mũraro ta iinemoque daja. Irire bũrigã werea mũare.

³ Irire mũare werenemogũra. Mũa õpa árĩcũ gahmemi Goãmũ. Ñerire iibirã Goãmũ yare iirã árĩque. Eropirã nome mera ñero iiro mariro árĩque mũa ũa. Mũa nome sã ũa mera ñero iiro mariro árĩque. ⁴ Ñero iibiraro mariro umupeori mera mũa marasã nomere opaque. Mũa irire masicũ gahmemi Goãmũ. ⁵ Goãmũre gamebirã Goãmũre masibirã ñerire Ƴaribejarã nomere erã gamero dopa ta iibiricãque mũa. ⁶ Õpa ta mũa iibiricũ gahmemi Goãmũ: Ne yujũ mũa acaweregũ marapore yajabiricãporo. Eropa yajagũ ãgũ acaweregũre umupeobigũ iimi ãgũ. Eropigũ eropa ãgũre mari Opũ iri ñerire ãgũ ya dipuwaja moabu árĩgũ tiimi. Eropirã mũare gũisãrã irire wereabu mũare. ⁷ Ñerire pepimorãre, ñerire iimorãre beyebirimi marire Goãmũ. Ñerire iibirimorãre õarire iimorãre beyemi Goãmũ marire. ⁸ Eropigũ õarire mari iimorã árĩcũ ãgũ Espĩritu Santo odigũ árĩmi marire. Eropirã iri ñerire iibiricãro gahmea. Eropigũ yujugũ i gũa wererare yũhribigũ Goãmũ yapũ sãre yũhribigũ ãhrimi.

⁹⁻¹⁰ Mũa acawererãre, Jesu yarãre mũa game mahiburire Goãmũ mũare buhetuhajami. ãgũ eropa buhecũ mũa diaye ta Jesu yarãre Macedonia majarã sãre árĩpehrerãre õaro mahi

umupeo waĩcua. Mũa eropa mahicũ peegu “Mũa acawererãre mahique,” arĩ buhebeaa daja mũare. Eropigu õpa dorea daja yũhũ. Mũa gajirãre mahiro dopa ta erãre mahinemoque. ¹¹ Eropirã mũa basi game ãhaturiro mariro arĩque. Gajirãre gajiropa arĩ wereniguibiricãque. Eropa ãacãque erãre. Eropirã mũa ya mohmeripũre õaro mohmeque. Ero coregue ta mũare eropa iidoreabũ. ¹² Mũa eropa mohmerã gajirãre barire amasome. Eropirã erã mũare õaro wereniguirãcoma.

I yebaguere Jesucristo ãgu dujariborore werepũ Pablo

¹³ Jesure gamebirã Jesu pohroguere wasome. Eropirã erã mera majarã erã sĩricũ ãarã burigã bũjawerema. Sĩrinirã mũra erã waborore diaye ta õaro mũa masicũ gahmea gũa. Gajirã erã bũjawerediro dopa mũa bũjawerebiriboro dopa mũare masicũ iidiaa. ¹⁴ Jesu ãgu sĩrira pũhrũ masa mũriadigu arĩmi. “Iri diaye ta ãhraa,” arãa mari. Eropa arĩrã arĩrã i sãre “Diaye ta ãhraa,” arãa mari. Goãmũpũ ãgu yarã sĩrinirã mũrare erã masa mũriacũ Jesu mera aricũ iigucumi. Iri sãre “Diaye ta ãhraa,” arãa mari.

¹⁵ Mari Opũ ãgu buhediro dopa ta ire werea. Jesucristo ãgu dujaricũ ãgu yarã ojocarirã sĩrinirã core masa mũriamũhtasome. Sĩrinirã mũrapũ ojocarirã core masa mũriamũhtarãcoma. ¹⁶ Õpa arĩroca Jesu ãgu dujaricũ: Mari Opũ ãgu basi dijarigucumi mũmũsigue arĩdigũ. Dijarigu bũũro mera werenigui, doregucumi. ãgu dorecũ

ĩḡu anyua opu burigã piyugucumi. Eropa
ĩḡu piyucũ Goãmu ya corneta busumãriroca.
Erã eropiicũ Cristore umupeonirã s̄irinirã m̄ara
masam̄aria m̄uhtarãcoma. ¹⁷ Erã p̄uhr̄u mari
ojocarirãre s̄irinirã masanirã mera Goãmu aĩ
m̄ariagucumi. Ĩḡu eropa iicũ mari Opu Jesure
bocat̄irirãca mari. Eropirã mari Opu Jesu mera
ár̄iniguicãrãca. ¹⁸ Eropirã i yu wererare m̄ua
mera majarãre wereque. Eropa arĩ wererã mu-
cubirirãca m̄ua ár̄ipehrerã. Mari Opu Goãmu
ĩḡu wereri ta ãhraa i.

5

¹ Jesu ĩḡu dujariburinãre “In̄ari ár̄icũ ĩḡu
dujarigucumi,” arĩ m̄uare were gojabeosome.
² Ĩḡu dujaririnãre marire masima masiya mara.
Yajari masu ñamigue guñaña mariro ĩḡu ya-
jagu ariro dopa ta i yebaguere mari Opu
guñaña mariro dujarigucumi. Iri sãre masia
m̄ua. ³ Eropirã masapu “Dohpaguere mari õaro
ár̄icãa. Ḡuhyari mara marire,” erã eropa arĩ
pepirisubu mata ñero waroca erãre. Ero eropa
wacũ ne nohogue gohra duhri wiria masisome.
Dederea warãcoma. Niji wahgũgo guñaña
mariro igo p̄uriro pepiro dopa guñaña mariro
eropa waroca masare Jesu ĩḡu dujaricũ. ⁴ Yu
acawererã, m̄uap̄ure eropa wasome. Yajari
masu wihi op̄ure ĩḡu ucudiro dopa ta m̄uap̄ure
eropa wasome. Jesu ariḡu m̄uare ucusome.
Nait̄iarore erã ĩha masibiro dopa gajirã Jesure
ne masibeama. M̄uapu erã iro dopa ár̄ibeaa.
⁵ M̄ua ár̄ipehrerã Jesu yarã ãhraa. Eropirã

boyorore erã ìha masiro dopa ta Jesu ìgũ arìborore masia mũa. Gajirà ìgũre masibirã iro dopa árìbeaa mũa. Eropirà ùcasome ìgũ dujaricũ. ⁶ Eropirà carĩrã iro dopa árìbìricãro gahmea. Òaro pee masirã àhri Goãmũ yare òaro pepiro gahmea. Eropirà Jesucristo dujari-borore òaro corero gahmea. ⁷ Ñamire carĩrã dopa árìbìricãro gahmea. Ñamire mererã dopa árìbìricãro gahmea. ⁸ Ëmũre árĩro dopa òaro pee masi árĩro gahmea. Eropirà marire watĩ ñero iidoreburire iibìricãro gahmea. Surara gamewejẽgũ wagũ come suhriro saña, come sãpea peya ìgũ cãhmotaboro dopa mari sãre watĩ ñero goroweoborore cãhmotaro gahmea. Òpa iiro gahmea watĩre cãhmotabure: Jesucristo “Diaye iigũ àhrimi,” arĩ umupeoniguicãro gahmea. Goãmũre masa sãre mahiniguicãro gahmea. Eropirà Jesu mera mari Goãmũ pohro mari árìburire masi corero gahmea. Mari eropiirã ñero iibiriburire cãhmotarã árĩrãca. ⁹ Ìgũ dipuwaja moamorãre marire beyebiripũ Goãmũ. Jesucristo mari Opũ marire dipuwaja marimorãre, peamegue wabonirãre ìgũ tau-morãre beyepũ marire. ¹⁰ Ìgũ Jesu mari ya árìburire ta sĩribasadigũ árĩmi ìgũ mera mari árìburire. Eropirà ìgũ dujaricũ ojocarirã árĩrã sĩrinirã sã yujuropa ta ìgũ mera árĩrãca mari ìgũ yarã árĩrã. ¹¹ Eropirà mũa mera majarãre dohpague mũa mucubìricũ iidiro dopa ta mũa basi mũa mucubìricũ iique daja. Eropirà mũa basi ta Goãmũre umupeonemocũ iique mũa mera majarãre Goãmũ yare wererã.

Jesu yarãre Pablo weretuñumi

¹² Jesucristo yare buherã mũa ãaro iiburire wererã áhrima mũa pohro. Erãre mari Opũ Jesucristo buhedoregũ beyeñumi. Erã ãgũ beyenirã árĩcũ ãaro umupeoque erãre. Mũa erãre eropa umupeocũ gamegũ bũrigã dorea mũaare. ¹³ Erã mohmerire erã iicũ erãre mahiri mera ãaro umupeoque. Eropirã gamequeãro mariro árĩrã gahmea.

¹⁴ Gũa acawererãre, mũaare, õpa bũrigã werea daja. Mohmediabirãre mohmedoreque mũa. Duhudiarãre “Goãmũ itamuri mera duhubiricãque,” arĩque erãre. Jesure merogã umupeorã sãre itamuque. Erã mata pee masibiricũ ãha guabiricãque erã mera.

¹⁵ Yujugũ mũaare ãgũ ñero iiquerẽcũ mũaapũ dipaturi ãgũre ñero ii gamebiricãque. Mũa mera majarãre árĩpehrerã gajirã sãre ãaro mera umupeoque.

¹⁶ Eropirã umuri nũcũ Goãmũ mera eropa mucubiriniguicãro gahmea mũaare. ¹⁷ Eropirã Goãmũre eropa serêniguicãro gahmea. ¹⁸ Mũa ãaro tarirã, mũa ñero tariquererã Goãmũre “Õhaa,” arĩro gahmea. Goãmũre “Õhaa,” arĩrã, Goãmũ ãgũ gamediro dopa ta iirãca mũa Jesucristo yarã árĩrã.

¹⁹ Eropirã Espĩritu Santo mũaare ãgũ wererire yũhribirã árĩbiricãque. ²⁰ Espĩritu Santo ãgũ masiri mera gajirã mũaare buheama. Erã eropa buhecũ erã buherire gamebirã árĩbiricãque. ²¹ Eropirã gajirã mũaare gajiropa erã arĩ buhecũ iri Goãmũ ya árĩbiricũ masique mũa. Eropirã Goãmũ ya buheri iri árĩcũ sãre masique mũa.

Eropirã õari dihtare gameque. ²² Eropirã iri ñerire árĩpehreri ñerire gamebircãro gahmea.

²³ Eropigũ Goãmũ marire õaro iirã árĩcũ iigũ ãhrimi. Ĩgũ ĩgũ basi mũare ĩgũ yarãre mũa õarã ñeri marirã árĩcũ iinemoporo mũare. Mũa dũpũ sãre mũa sĩporã sãre õaro ĩhadibuporo mũare. Mari Opũ Jesucristo i yebaguere ĩgũ dujari-boro core Goãmũ mũare õaro ĩhadibuporo mũa ñerire iibiriboro dopa. Ĩgũ eropa iicũ Jesucristo dujaricũ ñeri marirã árĩrãca mũa. ²⁴ Eropa ta iigucumi Goãmũ. Ĩgũ mũare beyedigũ ĩgũ arĩdiro dopa ta iimi.

Pablo erãre õadorebeoñumi

²⁵ Gũa ya õaro árĩburire Goãmũre serẽbasaque mũa sã, gũa acawererã.

²⁶ Jesu yarãre bocatĩrirã árĩpehrerãre mahiri mera mojoto ñeaque mũa.

²⁷ Jesu mari Opũ ĩgũ doreri mera mũare werea yũhũ. Árĩpehrerã Jesu yarã gamenererãre ipũre buheque mũa.

²⁸ Jesucristo mari Opũ ĩgũ mahiri mera mũare bũrigã õadorea. Eropa ta árĩniguicãporo. Iripẽta ãhraa.

Goãmu Yare Wereripu
Desano: Goãmu Yare Wereripu New Testament
copyright © 2011 Wycliffe Bible Translators, Inc.

Language: Desano

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 21 Feb 2024 from source
files dated 29 Jan 2022
17771afc-c309-57fd-9ff3-2d5a0cd59ff1